

新疆圖志卷四十九

軍制一

歷代

昔在兩漢盛時事征西夷廣威德西域羣胡交臂受事於是乎設都護置長史以鎮撫之夷考其制所將不過屯田之卒弛刑之士數百人千餘人耳其所資以威胡者亦惟取諸各國所謂某國勝兵數百人某國勝兵數千人咸受都護長史節制徵調而已而其卒伍之定額糗糧之實用卒不得而詳焉唐初建十六蕃州而皆統於都護府其事可謂盛矣然而析圭不出酋長之間守捉每在千里之外名曰統御實則羈縻而已所謂以夷攻夷者其用意殆與漢同獨安西北庭兩節度置官屬定兵額惜其未久陷於吐番元世祖平西域玉門陽關以西設三元帥府控制周匝規模廣遠再傳而後舊制蕩然夫當漢唐之時猶曰土地人民本非其有徒讐於一時之威帖耳就軛故其制亦暫而不可以久耳若元世祖

新疆圖志

軍制一

有其土地人民矣然海都叛割蹂躪無遺迨海都死而元社亦墟其故何歟豈非天命未著而力征經營之固未可以長恃歟惟我高宗應天順人克翦方命奄有西土乃定換防之制設將領之官列戍開屯燦然明備煌煌乎駕前代而上之及我

德宗收復全疆開行省設郡縣立標營罷屯防一變

國初之舊邇復參用西法汰標兵練新軍爲固圉綏邊之計自乾隆至於光緒之末新疆兵制凡三變夫椎輪者大輅之始也土鼓者雅樂之原也爰稽前代迄於

本朝審因革之殊軌識時務之攸宜撮而觀之可以得其梗概矣周衰戎狄錯居涇渭之北秦始皇攘却戎狄築長城界中國然西不過臨洮漢武用張騫之言思通西域以斷匈奴右臂遣李廣利攻降大宛西域震懼多遣使來貢獻於是東至敦煌西至鹽澤往往起亭障而輪臺渠犂皆有田卒數百人又置使者校尉領護以給使外國者此爲西域駐兵之始然當是時軍旅連出師行二三

都護但欽匈奴復畧有西域而漢代屯兵之制亡矣後漢光武中興西域諸國數請都護帝以中原初定北邊未服弗之許也明帝永平中命將北征匈奴取伊吾廬地置宜禾都尉以屯田遂通西域于闐諸國明年始復置都護戊己校尉及明帝崩焉耆龜茲攻沒都護陳睦匈奴車師圍戊己校尉章帝不欲耗中事西乃追還戊己校尉不復遣都護復罷屯田和帝永元三年北單于復爲右校尉耿夔所破逃亡不知所在其弟右谷蠡王於除鞬自立爲單于將數千人止蒲類海遣使欵塞大將軍竇憲以塞北地空欲結恩北虜乃上書請立於除鞬爲北單于置中郎將領護如南單于故事下公卿議司徒袁安司空任隗皆上封事阻之朝廷不從四年遣耿夔卽授璽綬賜王劍羽蓋使中郎將任尙衛護屯伊吾地如南單于故事六年班超遂定西域因以超爲都護居龜茲又以徐幹爲長史居疏勒復置戊己校尉居車師於是五十餘國悉納質內屬而鎮撫之略稱得焉安帝永初元年都護段禧等雖保龜

新疆圖志

軍制一

三

茲而道路阻塞檄書不通公卿議者以爲西域阻遠數有背叛吏士屯田其費無已六月詔罷西域都護遣騎都尉王宏發關中兵迎禧博僅及伊吾廬柳中屯田吏卒而還六年敦煌太守曹宗

按後漢書

作宗通典通考皆作崇未知孰是姑并錄之以備考

患匈奴復役屬西域諸國共爲邊患也遣行長史索

班將千餘人屯伊吾以招撫之至永甯元年北匈奴率車師後王軍殺後部司馬及班索等曹宗乘間請匈奴復取西域太后以問軍司馬班勇以爲不可許也舊敦煌郡有營兵三百人今宜復之復置護西域副校尉居於敦煌如永元故事又宜遣西域長史將五百人屯樓蘭西當焉耆龜茲經路南疆鄯善于闐心膽北扞匈奴東近敦煌如此誠便尙書問勇曰今立副校尉何以爲便又置長史屯樓蘭利害云何勇對曰昔永平之末始通西域初遣中郎將居敦煌後置副校尉於車師旣爲胡虜節度又禁漢人不得有所侵擾故外夷歸心匈奴畏威今鄯善王尤還漢人外孫若匈奴得志則尤還必死此等雖同鳥獸亦知避害若出屯樓蘭

足以招撫其心愚以為便長樂衛尉鐔顯廷尉綦毋參司隸校尉
崔據難曰朝廷前所以棄西域者以其無益於中國而費難供也
今車師已屬匈奴鄯善不可保信一旦反覆班將能保北虜不為
邊害乎勇對曰今中國置州牧者以禁郡縣姦猾盜賊也若州牧
能保盜賊不起者臣亦願以要斬保匈奴之不為邊害也今通西
域則虜勢必弱虜勢必弱則為患微矣孰與歸其府藏續其斷臂
哉今置校尉以扞撫西域設長史以招懷諸國若棄而不立則西
域絕望望絕之後屈就北虜緣邊之郡將受困害恐河西城門必
復有晝閉之儆矣今不廓開朝廷之德而拘屯戍之費若北虜遂
熾豈安邊久長之策哉太尉屬毛軫難曰今若置校尉則西域絡
繹遣使求索無厭與之則費難供不與則失其心一旦為匈奴所
迫當復求救則為役大矣勇對曰今設以西域歸匈奴而使其恩
德大漢不為鈔盜則可矣如其不然則因西域租入之饒兵馬之
衆以擾動緣邊是為富仇讐之財增暴夷之執也置校尉者宣威

新疆圖志

軍制一

四

布德以繫諸國內向之心以疑匈奴覬覦之情而無財費耗國之
慮也且西域之人無它求索其來入者不過稟食而已今若拒絕
執歸北虜夷虜并力以寇并涼則中國之費不止千億置之誠便
於是從勇議復敦煌郡營兵三百人置西域副校尉居敦煌羈縻
而已未能遂出屯也延光二年北匈奴連與車師入寇河西敦煌
太守張璠上書陳上策朝廷下其議尚書陳忠上書以為敦煌宜
置校尉按舊增四郡屯兵以西撫諸國庶足折衝萬里震怖匈奴
帝然之於是復以班勇為西域長史按前書西域傳各國下皆云去都護治所若干里後書西
域傳則云去長史諸若干里蓋自班超任向以後不復設
都護矣將兵五百人出屯柳中其後勇以次削平西域城郭諸國復屬
於漢當此之時各國之兵皆聽指揮於長史後漢書西域傳拘彌國勝兵千七百六十
人于闐國勝兵三萬餘人西夜國勝兵三
千人于合國勝兵一千人德若國勝兵三百五十人疏勒國勝兵三萬餘人焉耆國勝兵二萬餘人蒲類國勝
兵七百餘人移支國勝兵一千餘人東且彌國勝兵二千餘人車師前王勝兵二千人後王勝兵三千餘人然懷柔失
宜事變即起非如西漢之奉令惟謹可以操縱由己也順帝永建
六年帝以伊吾舊膏腴之地傍近匈奴匈奴得之資為鈔暴復令
開設屯田如永元時事置伊吾司馬一人楊嘉以後國威稍損諸

國驕放轉相陵伐至桓帝永興初後部玉阿羅多又攻圍漢屯田且固城殺傷吏士而前代先後經營之規制遂蕩然無餘矣魏晉以還中原多故無暇遠略隋初商胡雜居伊吾築城置戍又先後使使張掖武威間引致來朝者四十餘國乃致西戎校尉以應接之究其威德終未及西域也唐以武功定天下兵威所及亘古希倫貞觀十四年交河道大總管吏部尚書侯君集奉命討高昌下其地三郡五縣二十二城太宗欲以爲郡縣設兵置戍特進魏徵諫曰陛下初臨天下高昌夫婦先來朝謁自後數月胡商被其遏絕貢獻加之不禮大國遂使王誅再加若罪止文泰斯亦可矣未若撫其人而立其子所謂伐罪弔民威德被於遐外爲國之善者也今若利其土壤以爲州縣常須千餘人鎮守數年一易每及交番死者十有三四遣辦衣資離別親戚十年之後隴右空虛陛下終不得高昌撮穀尺布以助中國所謂散有用而事無用臣未見其可太宗不從以其地爲西州以可汗浮圖城爲庭州各置屬縣

新疆圖志

軍制一

五

又置安西都護府於交河城歲發兵數千人戍守其地十六年褚遂良復上疏以爲聖王爲治先華夏而後夷狄陛下興兵取高昌數郡蕭然累年不復歲調千餘人屯戍遠去鄉里破產辦裝又謫徙罪人皆無賴子弟實足騷擾邊鄙豈能有益行陳所遣復多逃亡徒煩追捕加以道途所經沙磧千里冬風如割夏風如焚行人萬里過之多死設使張掖酒泉猝有烽燧之警陛下豈得高昌一夫斗粟之用終當發隴右諸州兵食以赴之耳然則河西者中國之心腹高昌者他人之手足奈何糜弊本根以事無用之士乎且陛下得突厥吐谷渾皆不有其地爲之立君長以撫之高昌獨不得與爲比乎叛而執之服而封之刑莫威焉德莫厚焉願更擇高昌子弟可立者使君其國子子孫孫負荷大恩永爲唐室藩輔內安外甯不亦善乎帝仍不聽時諸國之通朝貢者又均置爲都督府有疏勒都督府焉耆都督府隸於安西都護二十一年討滅龜茲徙安西都護府以治之統轄疏勒于闐碎葉謂之四鎮惟兵額

不得而詳攷之唐史高昌勝兵且萬人焉耆勝兵二千餘人于闐勝兵四千人疏勒勝兵二千人夷男勝兵二十萬大抵彼地傳聞約略之辭蓋將與兵多就地用之惟聽徵調於都護已耳高宗嗣位不欲廣地勞人命有司棄龜茲疏勒等四鎮復移安西都護於西州至顯慶二年楊胄討平龜茲置龜茲都督府復移安西都護治焉以舊安西爲西州都護府鎮高昌故也按唐置都督府多以土人充職惟西州都督府則以漢人爲之而天山北路亦復置各都督府並隸於北庭都護初太宗旣擒頡利諸部相繼降附遙置各州設北庭大都督府以統之後賀魯來降置瑤池都督府永徽初賀魯叛廢之至是擒滅賀魯後以諸部遙置各都督府有金滿沙陀二州都督府大漠元池三都督府鹽泊雙河匐延嗚鹿絜山鷹娑六都督府尋復置崑陵都護府以統沙陀金滿二州而於賀魯故地別置濛池都護與崑陵南北分領諸部仍並隸於北庭大都護府咸亨初吐蕃恣肆西域安西四鎮並廢舊制蕩然上元初于闐國王入朝以其地置毗沙都督府長壽初

新疆圖志

軍制一

六

唐休璟收復四鎮仍置安西都護府於龜茲留兵三萬人戍之二年吐番大倫欽陵遣使請和武后遣郭元振往議之陵請罷置戍守以便萬姓各守本境以爲西十姓突厥四鎮諸國或時附蕃或時歸漢斯皆類多反覆伏乞聖恩宏大拔去鎮守分離屬國各建侯王使其國君人自爲守旣不疑漢又不屬蕃豈不人免憂虞荒陬幸甚振曰十姓四鎮本將鎮靜戎落以撫甯西土通諸大邦非有他求論今奚疑而有憂虞乎論曰使人此詞誠爲實論然緣邊守將多好功名見利而動罕守誠信此蕃國之所爲深憂也振謂茲事汗漫體大非末吏所能決當發使奉章以聞取裁於聖衷旣而以不犯邊約誓振與陵使乞思若共詣朝時朝廷以四鎮十姓事欲罷則有所顧欲拒則有所難莫之能決元振乃上疏曰臣聞利或生害害亦生利國家奄有天下園囿八荒而萬幾百揆之中最難消息惟吐蕃與默啜受命是將不利於中國若圖之不審則害亦隨之如防害有方則利亦隨之今欽陵所論惟分裂十姓拔

去四鎮兵防此是欽陵切論者若以為可允則當分明斷決之若以為不可允則當設策以羈縻之終不可直拒絕以阻其意使興邊患也臣愚駑罔識其策必以四鎮殷重事不可依何不言事以答之如欽陵云四鎮諸部與蕃接界懼漢密近蘭鄯北為漢患實在茲輩是亦國家之所要者今宜報陵云國家非怖四鎮本置此以扼蕃國之尾分蕃國之力使不得并力東侵今若頓委之於蕃恐蕃力强易為東擾必實無東意則宜還漢吐渾諸部及青海故地即俟斤部落當以與蕃如此足塞陵口武后從之四鎮兵如故長安三年復置北庭都護府於庭州統鹽泊等十有六州官屬如安西都護副都護二人長史司馬各一人錄事功曹倉曹戶曹兵曹法曹參軍各一人參事軍三人武氏倡亂後四夷多事邊方有寇戎之地則加以旌節謂之節度使睿宗初即改安西都護為節度使有兵二萬四千人馬二千七百疋開元六年改為四鎮節度使置官屬副使一人行軍司馬一人判官一人掌書記一人參謀無定隨軍四人統焉耆龜茲于闐疏勒四鎮保大軍一鷹娑都督一蘭城守捉八按保大軍在安西城內鷹娑都督以西突厥鼠尼施部置去西州千餘里蘭城亦在西州之西開元十二年

新疆圖志

軍制一

改為磧西節度使二十九年又改為安西節度使至德初改為鎮西節度使大曆三年仍曰安西亦曰安西四鎮節度使而北庭都護亦於開元二十九年改為北庭節度使官屬如安西節度有兵二萬八千人馬五千疋管瀚海軍北庭都護府城內開元中置管兵七千五百人馬二千四百匹建康軍張掖郡西二百里嗣聖初王孝傑置營兵五千四百人馬五百匹甯寇軍張掖郡東北千餘里天寶二年置管兵千七百人馬五百匹玉門軍酒泉郡西二百餘里武德中楊恭又置管兵五千二百人馬六百匹墨離軍晉昌郡西北千里管兵五千五百人馬四百匹豆廬軍敦煌郡城內管兵四千三百人馬四百匹新泉軍會甯郡西北三百里管兵千人張掖郡守捉管兵六千三百人烏城守捉管兵五百人交城守捉武威郡西二百里管兵千人白亭守捉武威郡西五百里管兵千七百人沙鉢守捉亦曰莫賀城在北庭之西五百餘里西伊二州之境皆屬焉至德而後大盜內訌夷狄乘間竊發自貞元三年以至貞元六年安西北庭相繼為吐番淪陷用是中朝命威不復能及於西域元和之初節度而外又有以安撫稱使者如李大亮為西北道安撫大使又有以經略稱使者如郭虔瓘為四鎮經畧安撫使其後紛紜變更無復常制又有行營如李嗣業為四鎮北庭行營節度軍有兼領如楊元卿以涇原渭節度觀察等使兼充四鎮北庭行軍然而名號移於軍戎而無撫綏防禦之實意廣明

以後中原多故僅同羈屬矣自唐以降諸國分併不常背服不一而五季之君內顧不遑無暇外事所以西陲兵制概係缺如宋有天下西域爲夏人所隔若回鶻高昌龜茲于闐等國貢使偶通然而聲教所不訖亦卽防範所不及也元太祖崛起朔漠兵力遠及於西域四年春輝和爾國主阿而忒的斤遣使歸降太祖命其仍居故地併哈密之地以封之是爲亦都護九年郭寶玉西收別十八里別石蘭等城十八年始定西域置達嚕噶齊監治及世祖混一寰宇凡邊徼咽喉之地無不遣兵置守而新疆南北兩路去叛王最近防閑猶不容稍疏至元十二年遣兵千人戍畏吾境十六年置鄂端元帥府以呼必賚布色將古古軍二千河西軍一千戍守其地十七年命萬戶綦公直戍別十八里又置鎮北庭都護府於畏吾境此十餘年間分兵置守皆因時制宜初無一定之規模也至元十九年置阿力麻里元帥府駐伊犁領天山北路二十三年置別十八里元帥府駐烏魯木齊領天山南路又置火州曲先元帥府領吐

新疆圖志

軍制一

八

魯番哈密至玉門陽關以東於是畫地分防制度井然矣至於成宗元貞元年立北庭都元帥府泰定元年以闊闊出鎮畏吾自是兵制日卽墮弛防務視爲故事相沿以至末季天山北路爲瓦拉部所統天山南路爲別十八里所據於是創垂所遺僅有威武王喃忽里鎮守哈密等處畏兀地分爲柳城火州吐魯番三萬戶以萬戶府統之而已然亦未幾就湮矣明代天山南路阻絕不通北路亦僅哈密吐魯番火州柳城數處稍有交涉初邊外歸附者官其長爲都督都指揮指揮千百戶鎮撫等官賜以勅書印記設都司衛所永樂四年遂立哈密衛以其頭目馬哈木火者爲指揮千百戶等官又以周安爲忠順王劉行爲紀善輔導冬授頭目十九人爲都指揮官五年哈密頭目請設把總一人理國政帝曰設把總是增一王也政令不一下安適從寢其議永樂十八年脫脫卒擢都指揮同知哈刺哈納爲都督僉事鎮守其地後其王率庸懦其頭目又多攜貳離散遂至三立三絕而閉關不問矣此兵制之

見於哈密者也吐魯番於永樂四年遣使入貢至二十年其酋爲別十八里酋歪思所逐走歸京師天子憫之命爲都督僉事遣還故土宣宗宣德三年都督鎖恪弟猛哥帖木耳來朝命爲指揮僉事後侵掠火州柳城皆爲所併又屢奪哈密旋服旋叛遂無一定此兵制之見於吐魯番者也究之以上二處官吏兵役皆就地挑選中國不過因時羈縻而已並非增防置守事事歸中朝之節制至於柳中火州國勢微弱時見脅於強大雖亦設有都指揮等官

永樂十一年都指揮白阿兒忻遣使來貢

尤爲規畫所不詳焉